

Diese Feier ist zu hören unter folgendem Link:

<https://www.rkmg.ch/veranstaltung/17521>

17-11-12 Feier zur Filmserie Starwars Gü

Andreas Renggli, Orgel, Tim Mettler, Trompete

Eingangsspiel: Main Titles <https://www.youtube.com/watch?v=D0ZQPgeJkk>

Begrüessig

mit dere Musig, wo am Afang vo jedem Starwarsfilm z'ghören isch, begrüesse nig öich hätzlech zu dere Fyr mit Musig u Gedanke zu dr Kultserie vo Starwars übere Chrieg zwüsche de Stärne, oder andersch gseit, übere Kampf zwüschem Böse und em Guete.

D Musig wo dr John Williams komponiert het, isch – anders als dr Fium sälber - nid futuristisch, si isch e Gägepol zu däm, wo i de Filme z'gseh isch. Dr Andreas Renggli het die Stück, wo mir hüt lose, arrangiert für d Orgele, wo när sälber druffe spiut und für Trompete und Flügelhorn, wo dr Tim Mettler spiut.

Mit dene üs vertroute Instrumänt cha me d Emotione i dene Filme guet zum Usdruck bringe.

Ig sälber ha ke einzige Starwarsfilm im Kino gseh. Wo dr Andreas mi gfragt het, öb ig mit ihm zäme e Starwars-'Gottesdiensch' wöu mache, ha nig nachere churze Zyt 'ja' gseit, wiu dr Inhalt vo dere Filmserie höchst aktuell isch.

Mir läbe inere Zyt wo ds Unmögleche ganz nach a ds Mögleche härechunnt.

Üsi Ouge wärde ufta für ne Dimension, wo a üsere Wirklichkeit verbi geit:

Gravitationswäue, wo entsande si bim Zämestoss vo schwarze Löcher, wo sichtbar und hörbar gmacht chöi wärde, oder d Kollision vo Neutronestärne wo me cha zueluege, Milione Jahr speter. Es sy Dimensione, wo d Gränze vo üsere Wirklichkeit und vo üsem Vorstellungsvermöge überschryte: mir bewege nis imene Gebiet vom Unmögleche. Das sy höchst religiösi Dimensione.

Drum machts Sinn ou i dr Chiuche über die Filmserie nache z'dänke, es paar Usschnitte a z'luege und die ydrücklechi Musig z'lose. Mir hei Usschnitte us de nöiere Fiume usgwählt, wo passe zu däm chirchliche Rahme und zur Aktualität.

Ds Unmögliche passiert ou im Starwars.

D Filmserie fat a aus galaktischi Wiederholig vo dr Wiehnachtsgschicht us dr Bibu.

Da isch die heiligi Familie, hochtechnologisch, wo e Frou bire jungfröiliche Geburt em Anakin Skywalker ds Läbe gschänkt het. Är wär dä, wo ds Guete verkörperet.

Doch sini Angscht und sini Arroganz hei leider derzue gfuehrt, dass dr Anakin uf dr dunkle Syte glandet isch und zum Darth Vader, zum Herrscher über ds Dunkle und übere Tod isch worde.

Är het d' Chraft in sich zum Böse umgewandelt.

Zum Glück isch nid alles Guete in ihm vollständig usglöscht worde, drum isch es mögliche gsi, dass viu speter si Sunn, dr Luke Skywalker, si Vater wieder uf die gueti Syte zrüggholt het.

Dr Chrieg in Starwars isch eine zwüschem Böse und em Guete, zwüsche de Sith Lords und de Jedi-Ritter.

Sowohl die Böse als die Guet hei die universali Chraft in sich. Die einti, de Sith Lords, missbruuche se für ihri egeti Macht us z breite, die andere, de Jedi, bruuche se zu Gunschte vo dr Gmeinschaft, um d Harmonie im Universum z' stärke.

Wenn d Chraft mit eim isch, denn bedüütet das, dass me d Chraft i sich cha la wücke ohni se z' misbruuche für die egete, egoistische Ziel.

«Möge die Kraft in dir sein» das isch egetlech e nöii Version vore aute religiöse Begrüessig oder Sägesformle.

'May the Force be with you' wird ins Dütsche übersetzt mit 'möge die Macht mit dir sein. I ha dä Satz übersetzt mit 'möge die Kraft in dir sein', wiu für mi ds Wort Kraft viu de positiveri Bedüütig het aus Macht. Me cha d Chraft ysetze für ds allgemeine Wohl, oder me cha d Chraft zum egete Nutze umwandle i Macht um über andere z herrsche.

Mir fö itz die Fyr a mit Musig mit em Titu 'the Force Theme: 'Möge die Kraft in

dir sein',

Zwischenspiel: The Force Theme <https://www.youtube.com/watch?v=HcZ9kQ1h-ZY>

1. Furcht

D Jedi-Ritter sy die, wo d'Chraft für ds Guete ysetze, si sy d'Beschützer vo dr galaktische Republik. Si dürquere ds Stärnesystem mitere innere Rueh, wo eim a die buddhistische Mönche tuet erinnere. Dr Uffrag vo de Jedi isch nid nume 'Frieden auf Erden' z'bringe, sondern im ganze Universum d'Chraft vom Friede la z' würke.

D' Jedi sy i dr Lag, ds Wäsentleche z'gseh, si dürschoue Zämehäng, si sy gschyd, si sy 'weise'. D'Chraft la z'würke isch e Frag vo dr Gschydi, und gschyd sy die, wo in Harmonie mit dr Chraft läbe, die wo anere Wält vo Grächtigkeit tüe schaffe.

Um zu dere Wysheit z'cho, muess me zersch sich sälber guet kenne.

'Gschyd isch dä, wo sich nid vo sire Angscht lat la leite.

Filmsequenz aus Episode 1 <https://www.youtube.com/watch?v=ktNzl8PPuyo>

Da steit dr chly Bueb, dr Anakin Skywalker vor em Jedimeischer. »Furcht ist der Weg zur dunklen Seite« seit dr Yoda, dr Jedi-ältescht. »Furcht führt zu Wut, Wut führt zu Hass, und Hass führt zu unsäglichem Leid«.

Wär d' Filme kennt, weiss, dass dä Anakin Skywalker sich haut äbe doch vo sire Angscht und vo sim Egoismus lat la leite und uf die dunkle Syte gratet und als Darth Vader unsäglechs Leid über d'Galaxis bringt.

Ou d'Mönsche lö sich immer wieder vo dr Angscht la leite und boue Wuet und Hass uf, wo zu grosse gsellschaftliche Problem u Instabilitäte cha führe. d politischi Entwicklige fasch überall uf dere Wält zeige, wie hüt d Angscht regiert, Angscht vor Verluscht vom hütfige Bsitz, Angscht vor Veränderige.

We me bi de Lüüt Umfrage macht, denn wei öppe achzg Prozänt meh Grächtigkeit, aber glychzytig wähle sie nid die, wo mehr Grächtigkeit sueche zum Bispiu e grächteri verteilig vo de Stüüre, wiu das chönnt ja ou sie sälber emau beträffe, dass sie de meh Stüüre müesste zahle.

d'Mehrheit vo de Bevölkerig isch dr Meinig, dass mir üser Umwält z'lieb nid

immer so chöi wyter wachse, konsumiere und umeflüge, aber niemer isch bereit si Läbesstil z'ändere. Die meischte entscheide sich de lieber für 'zrügg', für das wie's immer isch gsi, aus dass si sich tatkräftig für e besseri Zuekunft würde engagiere.

D'Angscht vor Verluscht fuehrt zu Wuet, Wuet fuhrt zu Hass und Hass zu unsäglechem Leid.

«Deine Wahrnehmung bestimmt deine Realität» seit dr Qui ^(kwai)Gonn Jinn zum Anakin Skywalker.

We mir dr Ander, dr Frömd, dr Flüchtling aus Bedrohig tüe wahrnäh, denn wird dä für üs i Realität öpper wo Wuet in üs uslöst und mir ihn plötzlech afö hasse. So entsteht Rassismus, wo zu unsäglechem Leid fuehrt.

We Mönsche sich vo ihrer Angscht lö la verführe und e Abwehrhaltig gägem Frömde ufboue, en Art e Rüschtig, wo sie sich dermit wei schütze, denn vermehre si dermit ds Leid.

Dä wo das durchschaut, wo sich nid vo dr Angscht lat la astecke, dä het en anderi Perspektive. Dä isch nid uf sich und uf sine egoistische Ziel usgrichtet, dä gseht wyter, dä gseht d'Sach und ds Verhältnis, so, wie sie würtlech sy.

Musik Yodas Theme:

<https://www.youtube.com/watch?v=TMw6ufg-g9Y>

2. Versuechig

d'Angscht fuehrt zur Versuechig, sich a falschi Sicherheite z'klammere. Unger em Deckmantel vo Sicherheit und vo Stabilität wärde demokratischi Gsellshaften schlychend zu Diktature umgestaltet.

Filmsequenz aus Episode III https://www.youtube.com/watch?v=ZrEco_srv7E

«Um allgemeine Sicherheit und Stabilität zu gewährleisten wird die Republik umgestaltet werden. So geht die Freiheit zu Grunde, unter donnerndem Applaus».

Dr Kampf zwüsche demokratisch gsinndte und tyrannische Figuren isch es Leitmotiv vo dere Starwarsserie.

E Demokratie isch immer gefährdet, we Mönsche ihri Eigeninterässe verfolge

und so die politischi Macht für sich i Aspruech nähme. d'No Billag-Initiative isch es Byspiu da derfür. d Solidarität als wäsentleche Bouschtei vor Demokratie wird untergrabe.

Wie ds Imperium hie i däm Filmabschnitt proklamiert wird, isch nid nume verglychbar mit dr Entstehig vom dütsche Rych ungerem Hitler, es zeigt sich immer wieder a mehrere Orte i dr Wält, in Burma, uf de Philippinen, i dr Türkei ... und wo no?

Mir läbe zum Glück inere Demokratie. Und d'Ufgab vo de Regierig isch, d Norme und d Wärte vore solidarische Gsellschaft z'schütze und z luege, dass ds Rächt vo de Schwächschte, vo dene, wo ungerm Existänzminimum läbe, allei erziehendi Müetere, Frömdi und Flüchtlinge, dass die Rächt nid verlorege. Und dass nid nume d' Eigeinterässe vo de herrschende Klasse d'üregsetzt wärde. Üsi Demokratie isch gfährdet, wenn nid ou mir alli druf luege, dass üse Staat die primäre Läbesbedingige schützt, dass dr Friede u d'Freiheit cha gwährleistet blybe. Das isch ds wichtigschte wo politischi Führer beruefe sy derzue, dass si tröi blybe däm Kärn vo Astand jedem andere Mönsh gägenüber.

Und mir, wo keni Machtspositione hei, wo keni politischi Leitigsufgabe usüebe, wie wärde mir i Versuechig gfuehrt?

Für üs ligt d'Versuechig im Gfuehl vor Machtlosigkeit.

Was chöi mir no, frage mir üs, wenn nid e mau d' Sicherheitsrat vor UNO im Stand isch öppis usz'richte, oder viu necher bi üs deheim: wie blöd chunnt me sich vor, we me müesam ds Plastic vom räschtleche Chüder sött trenne und me glychzytig liest, wie chemische Abfall im Meer deponiert wird? Oder we mir us Gwüssensgründ nüm i dr Karibik oder z'Asie wei Ferie mache und d' Nachbare gedankelos i dr ganze Wält umejette?

ds Gfuehl vor Machtlosigkeit isch starch und d'Versuechig, sich nüm meh z' engagiere, isch gross. Genau da luuret d' Gfahr, genau da wird d'Demokratie uf ds Spiu gsetzt.

Musik: Starkiller: https://www.youtube.com/watch?v=P1a_0IAGpLA

3.Hoffnung

D'Chraft, das isch ds Härz vo dr Starwarswält.

Alles hanget dervo ab, wie d Mönsche mit dere Chraft umgö und zämeschaffe. Es geit nid drum, die Chraft z'bejahe oder z'verneine, sondern wie me mit dere Chraft läbt. Es geit auso nid drum, a d'Existänz vo dere Chraft z'gloube oder nid z'gloube, es geit nid um Gloube oder Atheismus, sondern um d'Wysheit. Es geit ume Ungerschied zwüsche de Gschyde, wo in Harmonie mit dr Chraft läbe und selbstlos schaffe für ne grächti und solidarische Gsellschaft, und dene, wo egoistisch d'Chraft für ihri eigele Ziel umbiege und so ds Chraftverhältnis usem Glychgewicht bringe.

Filmsequenz aus Episode 1

<https://www.youtube.com/watch?v=MfDmu4f8l8I>

«Was sy de Midi-chlorianer?», fragt dr Anakin Skywalker dr Qui Gonn Jinn. Midi-Chlorianer sy mikroskopisch chlyni Wäse, wo i allne läbige Zälle sy. Es sig en Art vo Symbiose, e Läbesform, wo die Wäse zum gägesytige Vorteil äng mitenand verbunde sy. Ohni die Midi-Chlorianer chönnt's kes Läbe gö. Si syge duurend ufem Quivive, rede mit üs u säge üs, wohäre die Chraft üs söll bewege. Aber ersch wenn de gelehrt hesch, dini eigele Gfühel zum Schwyge z'bringe, wirsch ou du chönne ghöre, was sie säge.

Es isch en Art vomene Gebät, wo dr Qui gon jinn hie beschrybt. Me richtet sis Gebät nid gäge Himu, nee im Gägeteil, me richtet sis Gebät gäge inne, dür z'lose uf die inneri Chraft, weiss me, wie me für ds Wohl vo dr Gmeinschaft söll handle.

D'Jedimeischer hei e höheri Konzentration Midichlorianer im Bluet, drum chöi si ou meh vo dr Chraft erfahre u a die angere wytergä. Ds Glyche giut ou für üs, we mir üs sälber zur Rueh bringe, wie das i dr budhistische und christliche Meditation passiert, denn ghöre mir was d' Chraft üs verzeit u gspüre mir, wie mir sölle handle.

Starwars zeigt e spannendi Mischig vo Mystik und science Fiktion. Mit dr Sägesformle 'die Kraft möge in dir sein' wird es urauts Verlang i Wort zum Usdruck bracht, nämlech die brönnendi Hoffnig, dass ds Unmögleche vonere Wält, wo läbt in Friede und Grächtigkeit, eines Tages möglech wird. Die lydeschafflechi Hoffnig cha me usghöre im nächscte Musigstück: Princess Leias Theme.

Musik: Leia's Theme: <https://www.youtube.com/watch?v=UtkuZbcZORE>

Schlusswort

E Wält, oder es Land vo Grächtigkeit und Friede für alli blybt ou für üs e Utopie. We me meint, dass z'chönne mit Gwaut erobere oder z'feschtige, fühert das unweigerlech zu Diktatur und Tyrannei.

I de Starwarsfilme isch die dunkli Syte vor Tyrannei und Herrschaft verbunde miteme bestimmte musikalische Thema: em Imperial March.

Ds vorletschte Stück vom Ändu und em Tim het villech grad äbe wäge däm es eigets Läbe afa führe und wird bi bestimmte Sportverastautige gspiut, sobald dr Gägner uf ds Fäld usehunnt.

Musik: The Imperial March: <https://www.youtube.com/watch?v=-bzWSJG93P8>

Im Dezämber chunnt dr nächsct Starwarsfilm i Kino. Dr Luke Skywalker isch dr letscht Jedi, uf ihm lygt d Hoffnig, dass mit ihm dr Friede i dr Galaxis zrügghunnt.

Mit däm Wunsch vo Friede mache ou mir üs ufe Wäg: Möge die Kraft in dir sein!

May the Force be with you!

Musik The Throne Room: <https://www.youtube.com/watch?v=248ggPoK158>